

SCRIPT OF MORNING GOJRI NEWS BULLETIN 25JULY 2026

1015HRS

مارنگ گجری نیوز بولیٹن 25 جولائی 2026

یوہ آکاشوانی جموں ہے عبدالرحمان تیں خبر سُنو۔

SANJY RESUMES

سالانہ امرناتھ یاترہ 6 دن تک خراب موسم غی وجہ سنگ معطل رہن غے بعد اج جموں تیں دوبارہ شروع ہوگئی ہے عہدے داراں غے مطابق، 6 ہزار تیں زیادہ یاتریاں غو نوو قافلو بھگوتی نگر بُنیادی کیمپ تیں کشمیر وادی گا بالٹال بُنیادی کیمپ واسطے روانہ ہوو ہے۔ 19 جولائی نانہ مسلسل بارش تے جموں کشمیر مانہ خراب موسمی حالات خصوصاً پہلگام تے بالٹال غا رستاں ور احتیاطی تدابیر غا طور ور یاترہ معطل کردتی گئی تھی۔ حکام نے دسیو ہے جے یاتریاں گو 18 ووں قافلو جس مانہ مجموعی طور ور 6 ہزار 2 سو 69 یاتری شامل تھا۔ جن مانہ 1 ہزار 4 سو 70 خواتین 25 بچہ تے 54 سادھو شامل تھا۔ 2 سو 23 گڈیاں غا قافلہ مانہ سخت حفاظتی انتظامات غے تحت صرف بالٹال بُنیادی کیمپ واسطے روانہ ہوا۔

NHW REOPENS

جموں سرینگر قومی شاہراہ ور ٹریفک اج بحال کردتی گئی ہے جد رام بن ضلع غی بکھ بکھ جگہاں ور طویل بحالی گا کم مکمل کیا گیا۔ عہدے داراں نے دئے طرف دواں لیناں ور جمع ہوا ملہ نانہ ہٹان واسطے صفائی غو اپریشن شروع کیوہی پین غی وجہ سنگ شاہراہ دواں طرفوں بند ہوگئی تھی۔ جس غی وجہ سنگ سینکڑاں مسافر گڈیاں تے ضروری چیزاں بستاں نانہ لے جان آلا ٹریک رستہ مانہ پھنس گیا تھا۔ 2 سو 70 کلو میٹر لمی یاہ شاہراہ انتہائی اہم سمجھی جے کیونجے یاہ کشمیر نانہ ملک گا باقی حصاں سنگ سڑک غے ذریعے جوڑے۔

CM IFFJK CURTAIN RAISER

وزیر اعلیٰ عمر عبداللہ نے کل کہیو ہے کہ جموں کشمیر فلمی صنعت غے سنگ اپنا تاریخی تعلقات نانہ دوبارہ مضبوط بنان واسطے تیار ہے اُنہاں نے کہیو کہ جموں کشمیر غا پہلہ یعنی افتتاحی بین العوامی فلم فیسٹیول سنگ وادی نانہ دوبارہ ایک پسندیدہ فلم سازی غا مرکز غا طور ور عالمی سینما غا نقشہ ور نمایاں مقام حاصل کرن مانہ مدد ملے غی سرینگر مانہ آئی ایف ایف جے کے غی تقریب غا آغاز سنگ خطاب کرتا واں وزیر اعلیٰ عمر عبداللہ نے کہیو جے کشمیر غو بھارتی دلمی صنعت سنگ گہرو تعلق رہیو ہے تے ایک وقت ایسو تھو جد بالی وڈ تے کشمیر ایک دوجا واسطے لازم و ملزوم سمجھیا جیں تھا۔ اُنہاں نے مزید کہیو جے یوہ فلم فیسٹیول جموں کشمیر غی بھرپور ثقافت نانہ دُنیا غے سامنے پیش کرن مقامی نوجواناں غی حوصلہ افزائی کرن تے تخلیقی صلاحیتاں نانہ فروغ دین مانہ اہم کردار ادا کرے گو۔

KATHUA GRID STATION

جموں کشمیر حکومت نے ضلع کٹھوعہ مانہہ گریڈ سٹیشن غی استعداد مانہہ باہدہ غی منظوری دے دتی ہے۔ اس منصوبہ غے تحت گریڈ سٹیشن غی صلاحیت ترے گنا 50 ایم وی اے تیں بدھا غے 4 گنا 50 ایم وی اے کی جے غی۔ جد کہ اس غے سنگ متعلقہ بُنیادی ڈھانچہ غا کم وی انجام دتا جیں گا۔ اس منصوبہ ور 15 کروڑ 20 لکھ روپیہ لاگت آن گو تخمینو ہے۔ اس منصوبہ غو مقصد خطہ مانہہ بجلی غا ترسیلی نظام نانہہ مزید مضبوط بنانو، بدھتی وی بجلی غی طلب نانہہ پوراں کرنو تے ایک زیادہ مستحکم و قابل اعتماد بجلی گو ٹھانچو فراہم کرنو ہے۔ اس توسیع سنگ ترسیلی نظام غی پائیداری تے استحکام مانہہ نمایاں بہتری آوے غی۔ اور لوژنگ مانہہ کمی وے غی تے کٹھوعہ اس غا ملحقہ علاقان غا صارفین نانہہ بجلی غی فراہمی گا معیار مانہہ مجموعی طور ور بہتری آوے غی۔

RANA NANDI CHOOL

جل شکتی غا وزیر جاوید احمد رانہ نے کل ضلع پونچھ غی تحصیل منڈی غا دور افتادہ علاقہ نندی چول گو دورو کیوجت اُنہاں نے حالیہ پسی پین تے اچانک آن آلا سیلاب سنگ متاثرہ خانداناں سنگ ملاقات کی۔ ان آفات غا نتیجہ مانہہ کئی قیمتی جان ضائع ہوئی ہیں۔ تے برا پیمانہ ور نقصان اُجیو ہے۔ غم زدہ ماحول مانہہ وزیر موصوف نے سوگوار خانداناں سنگ ملاقات کی۔ اُن گا دُکھاں درداں نانہہ سُنیو۔ تے اس سانح ور دونگا دُکھ گو اظہار کیو۔ اُنہاں نے متاثرہ خانداناں سنگ دلی تعزیت غو اظہار کرتا واں یقین دوايو۔ جے حکومت اس مشکل غی کھڑی مانہہ اُن غے سنگ پوری مضبوطی سنگ کھلی ہے۔

ED SEARCHES

انفورسمنٹ ڈائریکٹوریٹ یعنی ای ڈی غا جموں سب ڈونل نے انسدادمنی لانڈرنگ ایکٹ پی ایم ایل اے 2002 غے تحت 23 جولائی ویروار نانہہ جموں کشمیر تے پنجاب مانہہ 9 جگہاں ور تلاشی کاروائی انجام دتی۔ یہ کاروائی منشیات غے ذریعے دہشت گردی غی مالی معاونت غے متعلق جاری منی لانڈرنگ تحقیقات غا سلسلہ مانہہ کی گئی۔ پریس بیان غے مطابق تحقیقات مانہہ پنجاب تے جموں کشمیر غے بشکار سرگرم منشیات تے دہشت گردی غی مالی معاونت نیٹ ورک غو انکشاف ہوو ہے اس نیٹ ورک مانہہ پنجاب غا مبینہ کارندہ ستنم سنگھ تے منہیت سنگھ عرف مان جد کہ کپواڑہ کنٹرول لائن غے نیڑے غا علاقہ سنگ تعلق رکھن آلا صفیر احمد تے کتیل احمد شامل ہیں تلاشی کاروائیاں غے دوران کئی بینک خاٹاں نانہہ وی منجمد کیو گیو ہے۔

MACHAIL YATRA DEFERRED

ڈپٹی کمشنر کشتواڑ پنکج کمار شرما نے اطلاع دتی ہے جے شری مچیل ماتا یاترہ 2026 جہڑی اج تیں باضابطہ طور ور شروع ہونی تھی۔ خراب موسم غے باعث 27 جولائی تک ملتوی کردتی گئی ہے ڈپٹی کمشنر موصوف نے دسیو ہے جے یاترہ غو آغاز ضلع انتظامیہ غی طرفوں موسمی صورتحال غو جائیزو لین غے بعد ہی کیو جے غو اُنہاں نے کہیو جے پوتر مقام غو ہولی کپاٹ یعنی دروازو اج مزہبی رسومات غے مطابق کھول دتو جے غو اُنہاں نے مزید کہیو

جے اگر موسم سازگار رہیو تاں 28 جولائی تیں عقیدت منداں غی یاترہ شروع کردتی
جے غی۔ انہاں نے کہیو جے تمام یاتریاں واسطے آن لائن اندراج تے آر ایف
آئی ڈی لازمی ہے۔

WEATHER

محکمہ موسمیات نے پیش گوئی کی ہے جے اج تیں 27 جولائی توڑی جموں صوبہ
گا بکھ بکھ مقامات ور ہلکی بارش گرج چمک غے سنگ بارش گو امکان ہے جد
کہ بعض علاقہاں مانہہ خاص طور ور سویرے یا دیر شام کدے کدے شدید بارش
وی ہوسکے۔ محکمہ موسمیات غے مطابق، 28 جولائی تیں 31 جولائی غے دوران
ایک نوو بارشاں گو سلسلو متوقع ہے جس غی وجہ سنگ پورا مرکزی زیر
انتظام علاقہ خصوصاً جموں خطہ مانہہ وسیع پیمانہ ور بارش تے گرج چمک
ہون غو امکان ہے۔

PROG ANN

آکاشوانی جموں غو علاقائی خبراں آلو شعبو 26 جولائی 2026 نانہہ تہاڑی غا 2 بج
غے 30 منٹ ور کارگل وجے دیوس غا موقع ور 30 منٹاں ور مبنی ایک خصوصی
مباحثہ ور پروگرام نشر کرے غو۔ اس خصوصی پروگرام غو موضوع وے غو،
نمن تے سمان۔ اس خصوصی پروگرام مانہہ مارا مہمان ویں گا، ریٹائیر کرنل
آر کے شرما جھیڑا پروگرام غا موضوع ور اپنی قیمتی رائے تے ماہرانہ خیالات
سانجہ کریں گا۔ پروگرام غی میزبانی کریں غی ماری انکر شروتی کھجوریہ۔

NEWS READ BY ABDUL REHMAN
NEWS EDITOR KUNAL SHRIVATSA
DEO NUSRAT
SKILLED RAJAT